

Ե .

Սատանան ետես զԱդամ, ի դրախտին դուռն էր նա կանգնած.
 Չերկու ձեռքն յիրար իզարկ ու բարկ բարկ յինքըն ծիծաղաց.
 Ադամ զայս պատասխանեաց՝ Ի՞նչ տեսար, քու փառքդ անիծած.
 Թեպետ դրախտեն հանեցիր, չիթողու իմ Տերն ի ձեռաց:

Չ .

Սատանան տեսաւ զՄովսէս, արգելեց եւ շատ մի իլաց:
 Իմ Աստուածախօս՝ Մովսէս, մեր Տերն Է՞ր է մեզ խըռոված.
 Երբ մեք աշակերտ եաք Աստուծոյ, Ադամ չէր ստեղծած.
 ՉԱդամ ի հողուն ստեղծած, մեք ի փառացն եմք զըրկած:

Է .

Եկին անտիս բերին Ադամայ թե՛ Նիստ ու խընդա՛,
 Եղեմ դըրախտեն ելար, պատճառ ո՞վ եղաւ, մէկ ասա՛.
 Թէ զօճն ու զԵւա կ'ասեն, նա պատճառ եղաւ Սատանայ,
 Ես քեզ Սատանայ եղայ, ինծի ո՞վ եղաւ՝ մէկ ասա՛:

Ը .

Մեր Տերն ի յերկնից ի վար սիրտ ելաւ թե՛ «Գա՛մ Սա՛տանայ,
 Առնում զԱդամայ հոգին ու գըրեմ ի թըղթին վըրայ,
 Ըզճնունդն ալ ի հետ հանեմ, ազատեմ ի հետ Ադամայ,
 Ըզդժոխն ալ աւար առնեմ, թէ հազար շինես, Սա՛տանայ:

ԻՆՆԵՐՈՐԴ ՏԱՂԱՇԱՐՔ

ԵՐԳ ՊԼՈՒՉ ՎԱՐԴԱՊԵՏԻ ԱՍԱՑԵԱԼ

Ա .

Երկուս ի մէկտեղ բերած գերդ ընկեր կ'ասեն թէ պահէ՛.
 Ու չորս բընութիւնս օտար հետ իրաց կ'ասեն թէ սազէ՛.
 Յինգ դուռն է ի բաց թողած, զայդ ամուր կ'ասեն թէ փակէ՛,
 Չիս հոգս ի յայսոց միջին գերդ կըրակ ըզմոմ կու հալէ:

Բ .

Չերկուս ընկեր ո՞նց պահեմ, մէկըս հող մէկըս հոգի է.
 Յոգիս թէ ի վեր քարշէ, հողըս ծանր ի վայր կու հակէ.
 Վախեմ թէ հողոյս լըսեմ, նա հոգոյս յոյսըն պակասէ.